

續藏書

第四冊

(明) 李 贄 著

續藏書

第 八 卷
靖 難 功

中

第 八 冊
名 臣
輔 臣

日 局

續藏書卷八

靖難名臣

太師蹇忠定公

事孝陵、長陵、獻陵、景陵

公名義。字宜之。初名瑤。巴人也。洪武十八年進士。授中書舍人。一日上顧公問。汝蹇叔後乎。卽書義字。賜公易名。一考當調。命滿九載。曰。朕且用義。建文卽位。知太祖欲用。超陞公吏部右侍郎。靖難後。轉左。逾月陞尙書。代張紱。當是時。盡改建文諸例。一復洪武之舊。公從容爲上言。上喜公忠實。或遂譖公不忘建文。上不聽。永樂二

年。兼詹事。上欲諭太子。率令詹事往導意。太子尤愛重公。七年。巡北京。佐太子監國。諸王及遠夷奏請。詣行在所。餘悉啓太子處分。九年。與夏公同考滿。賜宴勅獎諭。十七年。父喪歸。起復。詣北京謝。遣中官護還京。明年。從太子朝北京。十九年。三殿災。特勅廷臣二十六人。巡行天下。公及給事中馬俊。巡應天諸郡。問民疾苦。考察陟斥文武吏。出太甚者數人。還吏部。二十年。上北征還。坐東宮事。與西楊頌。繫錦衣衛。尋釋。獻陵卽位。首進公少保兼尙書。支二俸。歷進少傅少師。賜公等繩愆糾繆銀圖書各一。諭曰。朕有過舉。卿卽具疏。用此封識。及黃文

簡公誥草。上特增二語曰。勿謂崇高而難入。勿以有所從違而或怠。聖主又面諭曰。此朕實心。未幾。又製蹇忠貞印賜公。公重厚。不敢專斷。每承顧問。常持兩端不能決。西楊謂公過思。公應曰。事不熟慮。恐後有患。上笑曰。義士奇所言皆是。東楊或詆公。語聞上。上不直東楊。公頓首言榮無他。大臣宜如此即左右有讒榮者。願皇上愼察。上笑曰。吾亦不信。偶言及耳。宣德初。從征漢庶人。軍中進止多從公。時議赦交趾。公及夏公力言祖宗疆土不可棄。上不聽。命擇人使交趾。公欲薦伏伯安。西楊語夏公。伯安不可使。公當榻前力爭。當是時。上尤信夏公。比召

諸大臣入議。公薦伯安。上顧原吉云何。對曰。不可。公曰。伯安有口才。羣臣不及。上又顧問士奇云何。對曰。伯安有穢行。無學識。遣使必辱國。上從二人言。不遣伯安。公亦不以二人爲異己。宣德三年秋。從巡邊還。上顧蹇少師老。不欲煩以事。敕曰。卿事祖宗。積效勤誠。朕嗣統。尤資贊輔。今春秋高。尙典劇司。非所以優老待賢。唯師保官。寅亮爲職。可輟吏部務。朝夕在朕左右。討論至理。共寧邦家。其專精神。審思慮。益致嘉猷。用稱眷倚老成之意。明年夏。郭進代公尙書。又賜公忠厚寬弘銀章一。七年秋。令有司治公第。八年。一品。九年。賜宴禮部。公生日。

賜鈔萬馬一。裕陵卽位日。公齋宿得疾。越五日卒。年七十三。贈太師。諡忠定。公孝友質實。和厚簡靜。處人有量。未嘗一語傷物。歷事六朝。凡五十年。貴而能謙。富而能約。上前所言。未嘗退以語人。在吏部。尤愼擇郡守。考察明恕。不苛不縱。公子英、荃皆尙寶司丞。長陵卽位之歲。至成化丁亥。凡六十六年。吏部尙書四人。公及郭公兩王公。而何公協佐者不與焉。自後至正德終。五十四年。凡更十八人。而尹公最久十四年。

太師夏忠靖公

事孝陵、長陵、獻陵、景陵

公名原吉。字維詰。湘陰人。鄉薦遊太學。選入禁廡書誥。

授戶部主事。尙書郁新奇之。與商榷諸司事。劉郎中者。忌公。會劾諸司怠事者。上曰。宥之。新請必罪。上怒新。問誰教汝。新免冠謝。得已。劉郎中因奏。果人教尙書者。意中公。上問新爲誰。對曰。堂後書算生教臣。臣愚過聽。萬死。上下書算生獄。劉郎中又奏。公專尙書柄。言前事實。原吉教尙書。上曰。聞原吉能佐尙書。汝顧欲陷原吉耶。劉郎中與書算生皆棄市。建文卽位。逾月陞戶部右侍郎。明年充採訪使巡福建。未幾移鎮蘄州。靖難後轉左。或言公建文用事人。不宜大用。上曰。原吉忠于太祖。以故忠于建文。又豈不朕忠耶。逾月進尙書。永樂元年。吳

浙大水。公行視水。遣僉都御史俞吉。賜公水利集。累遣侍郎李文郁、大理少卿袁復、陝西參政宋性佐公。公言浙西諸郡。蘇松最居下流。常湖嘉三郡土田高多下少。環以太湖。綿五百里。納杭湖宣歙諸山水。注澱山諸湖。入三泖。頃浦港湮塞。匯流漲溢。傷害苗稼。拯治之法。宜浚吳松諸浦港。泄其壅淤。以入於海。吳松江袤二百餘里。廣百五十餘丈。西接太湖。東通海。前代屢疏以當潮汐。沙泥淤積。旋疏旋塞。自吳江長橋至下界浦。約百二十餘里。雖稍通流。多有淺窄。又自下界浦抵上海南倉浦口。可百三十餘里。潮汐壅障。茭蘆叢生。已成平陸。欲

卽開浚。工費浩大。且艷沙淤泥。浮泛動盪。難以施工。臣等相視得嘉定劉家港卽古婁江。徑通大海。常熟白茆港。徑入大江。皆廣川浚流。宜疏吳松江南北兩岸安定等浦港。引太湖諸水入劉家白茆二港。使直注海。松江大黃浦乃通吳松要道。下流壅塞。難卽疏浚。旁有范家濱至南倉浦口。可徑達海。宜浚令深闊。上接大黃浦。以達泖湖之水。此卽禹貢三江入海之跡。俟旣開通。相度地勢。各置石閘。以時啓閉。每歲水涸時。修圩岸以禦暴流。上從之。役夫凡十餘萬。公布衣徒步。日夜經畫。盛暑揮蓋。歲饑。奏發粟三十萬石賑濟。二年還朝。復出治水。

水洩。農田大利。召還部。時賞功封建。征夷下番。營北京。費億萬計。皆取辦于公。從上北巡。兼掌行在吏禮兵部都察院事。八年。上北征。輔太孫留守北京。總理行在九卿事。諭曰。朕以房玄齡視卿。公旦入朝。獨近展前。參決機務。朝退。郎官御史環請事。公口應手判。不動聲色。駕還。扈還京。尋令侍太孫周行鄉落。取蠶黍進太孫。曰。願殿下味此。九年滿考。宴便殿。諭廷臣曰。原吉高皇養成賢德。欲觀古名臣。此其人矣。命與姚廣孝監修國史。十一年。扈北巡。侍太孫居上營後。十四年。侍太孫還南京。十五年。從幸北京。十八年。宮殿成。命召太子太孫于南

京十九年。三殿災。詔求直言。言者輒云都北京不便。主事蕭儀言尤峻。上怒殺儀。曰。吾與大臣密議數月。言遷都便。言官遂劾諸大臣。上跪言官大臣午門。難遷都利害。都御史陳瑛罵言官白面書生。不知大計。上令左右問衆議云何。公曰。臺諫職言路。且應詔陳言。臣等備員大臣。不能協贊大議。臣等萬死罪。再問對如初。上說。盡釋言官大臣。上御便殿闕門。每召公語移時。左右莫得聞。退則恂恂若無預者。交趾平。上問陞賞孰便。對曰。賞費於一時有限。陞費于後日無窮。上從之。法王來朝。上欲郊勞。公以爲不可。法王見便殿。命公拜。又不肯拜。上

笑曰。卿欲效韓愈耶。過侍郎楊勉之遠矣。十九年。上議征虜。公力諫。上怒。繫內官監籍其家。竟北征阿魯台及兀良哈。明年。又征阿魯台。又明年。北征還。至榆木川。不豫。顧左右曰。原吉愛我。上計至。太子走公繫所。呼公哭曰。楊榮至。父皇賓天矣。公伏地哭。不能起。太子卽位。復公戶部尙書。會母喪。乞終制。上曰。卿老臣。宜共濟艱難。卿無母。我有父乎。如卿辭職。朕亦不當在此。不允。立太子。兼太子少傅。尋進少保。兼太子少傅。尙書如故。支三俸。固辭。許辭太子少傅俸。洪熙元年冬。無雪。上作憂民吟。授公和。賜田五頃。建第兩京。李時勉廷諍。激上大怒。

言時勉當朝辱朕。公曰。時勉小臣。豈能損聖德。願少霽天威。下法司議罪未晚。太子去南京。上崩。昭皇后命公急迎太子。太子將至。羣臣郊迎。后留公佐襄王居守。太子既卽位。時時密咨公。或袖小帖付公。公亦時時有所白。宣德元年。漢庶人反。指公徵赦。租爲奸臣首。上夜召諸大臣議。公免冠頓首曰。臣罪當死。上曰。彼借卿爲兵端耳。命坐屏左右密議。東陽首勸親征。上難之。顧公對曰。往事可鑒。得此一贊決臣見所遣將。語臣兵事輒泣。臨事可知。兵貴神速。卷甲趨之。所謂先人有奪人之心也。榮言是。上意遂決。師臨城。庶人猶令人繞城罵公。三年。賜

範金銀印。曰含弘貞靖。曰謙謙齋。曰後天下樂。從巡邊
還。上念公老。勅輟部務。俾專論道左右。明年夏。召郭資
代公。是冬。從閱武郊外。公生日。上繪壽星圖爲詩賜公。
五年春。卒。贈太師。諡忠靖。復其家。朝議公宜贈伯。西楊
不可。後三年。郭資卒。得贈湯陰伯。公天性寬平。酌大體。
略煩苛。以故雖數興大役。供餉贍給。而民不繹騷。人無
識不識。皆謂公君子長者。呂震嘗上前短公柔奸。震爲
子求官。上問公。公稱震有守城功。陳瑄靖難初欲殺公。
公力薦瑄才。此人所難總漕運。周忱爲長史。或薦爲郡守。公
言郡守不足展其才。具隻眼忱得陞侍郎巡撫。當是時。蹇

夏齊名。蹇公簡重。夏公弘裕。外兼臺省。內參館閣。三十年間。民安吏治。有古大臣之風焉。公監修太祖。成祖。仁宗三朝實錄。太祖實錄凡三修。建文中。徐輝祖監修。永樂中。李景隆監修。再公監修。解學士表公治水東南有功。吳人尸祝之。正統間。勢家奪水利。溝防盡壞。周文襄公治之。纔十餘年。又壞。景泰中。李侍郎敏治之。弘治中。又壞。徐侍郎貫又治之。正德末。又壞。李尙書充嗣。又治之。

太保黃忠宣公

事孝陵、長陵、獻陵、景陵、裕陵

公名福。字如錫。昌邑人。鄉貢士。爲項城主簿。改清源。有

惠政。遷金吾前衛知事。陞龍江衛經歷。洪武中。上書論大計。上奇公。三十一年四月。超陞工部右侍郎。靖難後。李景隆指公爲齊黃黨。公厲聲言。臣罪固應死。但目爲奸黨。則臣心未服。上不問。復其官。尋轉左。逾月陞尙書。永樂三年。都御史陳瑛劾公不恤工匠。改北京刑部尙書。四年征交趾。公及大理卿陳洽轉軍餉。旣郡縣交趾。公以尙書兼掌布按二司事。公視民如子。勞來安輯。躬勤不倦。又戒郡邑吏專意撫字。曰。新造之邦。新附之民。政令條畫。並宜寬簡。中朝士遷謫至者。咸見溫恤。問疾周貧。禮賢雪罪。兵民感悅。夷蠻欣附。中官馬騏怙恩肆